

Oscar Vidal

PERIODISMO, UN TRABAO INTERESANTE Y DIFICIL

Despues di a traha 2 aña y mey cu La Prensa, na Februari 1987 mi a forma parti di redaccion di DIARIO. E tempo ey mi tabata encarga cu cubrimiento di diferente noticia entre otro polis, internacional, corte, conferencianan di prensa, entrevista.


Na La Prensa, Tom Pietersz, tabata esun cu a hinca'mi realmente den e mundo di periodismo. E tempo ey el a siña'mi pa skirbi mas tanto cu ta posibel ora bo cubri un caso, un conferencia, etc. envez di graba riba cassette. Te dia di awe mi ta haciendo esey y si mi usa cassette esey ta mas bien pa relata kico un persona a declara. Na La Prensa

mi a cera conoci cu Donny Lacie, kende p'ami ta un tremendo periodista, un persona cu bo por intercambia di idea riba tur topico. Nos tabatin un bon relacion di trabao y esaki a yuda'mi hopi den mi carera periodistico.

Na DIARIO mi a traha hopi cu Jenny Cratz kende tabata e hefe di redaccion y tabata tremendo den su forma di dirigi personal di redaccion y cera corant. For di Jenny Cratz mi a siña entre otro con tin cu cera un corant, kico bo mester tene cuenta cune y tambe etica periodistico cual ta hopi importante. Jenny Cratz tabata un persona cu tabatin hopi contacto cu su personal

pa e sa kico ta e noticianan di e dia ey. Ora mi haya'mi den un situacion fastioso en especial cu noticianan delicado, e tabata yuda'mi formula e noticia.

Si bo papia di DIARIO bo no por keda sin menciona Jossy Mansur kende ta e columna vertebral di e corant. Jossy Mansur ta un persona cu mi tin masha aprecio p'e pa su forma con e ta intercambia di idea cu bo riba un topico. Semper mi ta consulta cu Jossy Mansur ora mi kier publico un articulo caminda mi kier señala un desaroyo cu no ta corecto. Hopi biaha, promer cu mi publica un articulo mi ta lag'e controla esaki pa asina mi ta sigur cu mi a



atene mi mes na etica periodistico.

E trabao di periodista ta hopi interesante pasobra bo ta e persona cu tin a tarea dificil di informa bo lectornan na un forma obhetivo y corecto kico a sosode pa asina e lector compronde kico a pasa y nan saca nan conclusion.

Esey ta exige hopi di bo pasobra semper bo mester percura pa bo ta obhetivo y trece e noticia di manera cu tur hende ta compronde kico a sosode y cu bo no ta trece bo opinion den e noticia, aunke con hopi loke a sosode por afecta'bo. Bo tarea primordial ta pa trece e informacion corecto caminda bo mester atene bo mes na etica periodistico cu ta encera basicamente respet. Si bo duna respet bo ta haya respet. Promer cu bo publica un noticia bo mester tene cuenta cu diferente punto:

- verifica cu loke bo ta publica ta e berdad;
- ki consecuencia publicacion di e noticia tin pa henter comunidad, pa e persona involvi, famianan, etc.;
- no forza lector di pensa den un direccion door di pone bo opinion den un noticia;
- opinion y comentario riba un noticia mester bay separa di e noticia;

Mi a bay e curso nacional di periodismo caminda ademas di siña palabranan crioyo di nos dushi papiamento, tabatin lesnan di

periodismo caminda tur esnan cu a bay e curso tabata intercambia di idea. Esaki tabata e parti bunita pasobra cada un periodista tin su opinion di un noticia pero na final di e discusion tur tabata comparti e opinion cu mester tene debito cuenta cu e etica periodistico cu ta importante.

Den e lesnan di curso nacional di periodismo tambe a haya e parti di gramatica cu tabata hopi interesante. Tur esnan cu a bay e lesnan aki awe ta gradicido na e docentenan, kendenan a pasa un poco di nan conocimiento na nos cu tin e tarea importante y dificil di informa pueblo di kico ta pasando.

Ultimo tempo por a constata cu tin masha hopi redashi ta circula. Esaki realmente no ta noticia pasobra manera ya mi a menciona, prensa mester atene su mes na etica periodistico. Mi ta kere cu esaki ta e forma mas corecto y obhetivo pa trece informacion na pueblo.

Actualmente mi ta un di e asistentenan di hefe di redaccion cu ta encarga cu ceramento di e corant. Ademas di esey mi ta cubriendo casonan den Corte, haci entrevistanan, cubri conferencia di prensa.

Mi ta gradicido na Tom Pietersz, Donny Lacie, Jenny Cratz y Jossy Mansur cu a contribui na mi carera periodistico.

18 AÑA DIARIO
Sirbiendo pueblo!!
Masha Dabien!!
Mementomori Funeral Home

DIARIO
18 aña di Tradicion den Pueblo Arubano!!
CARIBBEAN TOWN BEACH RESORT